

prefetin, nepote dil papa; e tutte queste cosse indicha novi pensieri e fantasie.

*Di Cypro, si ave letere.* Di le novità di le merchadantie tolte etc. *Item*, esser ritornà sier Hironimo Zustignan, stato orator al soldan, con li presenti. *Item*, zercha formenti; e si à 'uto assa' formenti di Cypro, *adeo* à dà grande ajuto a questa terra, con laude di sier Piero Balbi, luogo tenente nostro de li.

La nave Tiepola è sora porto; le galie di Baruto, vien, à colli 1100 di specie, 100 di sede, il resto formenti, i qualli bona parte è stà venduti a Corfù e al Zante.

*Item*, è morto a Damasco sier Antonio Venier, *quondam* sier Marco, da Negro Ponte, cazuto zoso di una teraza.

Fo fato uno ai X savij, sier Nicolò Malipiero, *quondam* sier Antonio, fo camerlengo di comun; sora i daci, sier Francesco di Prioli, fo ai X savij, *quondam* sier Marin; et sora le vendede, sier Piero di Prioli, fo provedador al sal, *quondam* sier Beneto, et sier Hironimo Contarini, fo di pregadi, *quondam* sier Batista, stato altre volte.

*A dì 31. Post fo San Marcho.*

54 *Copia de uno capitolo di letere di sier Francesco Capelo, el cavalier, orator nostro in Alemania.*

Im provintia di Syria (*sic*) apparve, a di 15 zener proximo passato, uno homo, a persone assai, qualle era morto circha anni 30 avanti. Questo homo ha manifestato a molti le conditione de' suo' defuncti, ed ad alcuni li lhoro secreti, et per zornata prediceva molte cosse, *adeo* che quelli lo ha veduto, et *presærtim* alcuni vechij, che lo cognoscete vivendo, rimanevano stupefacti. Se dice, che a di 25 del dicto mexe, essendo in mezo de molta zente, disparse; et che per i zorni apparse, domandava elemosina per l'amor de Dio.

In letere, date a di 30 marzo, tenute fin 4 april, in Hacnau, et recevute a di 18 april 1505, notate qui avanti.

55 *Dil meze di fevrer 1504.*

Introno, a di primo, do consieri novi, sier Francesco Barbarigo, et sier Nicolò Foscarini, sier Christofal Moro era za intrato, e li cai di 40.

Da poi disnar il principe andò, justa il consueto, a Santa Maria Formosa a vesporo, vestito di bianco,

*videlicet* la bareta, et manto damaschin bianco dorado, col bavaro di armelini. Era li oratori, Franza, tre di Polona, e lo arziepiscopo di Spalato, da cha' Zane. Et poi vesporo si redusse collegio, et vene letere di Roma; et fo consejo di X, con zonta di colegio et altri, et steteno fino hore cinque di note ivi.

*Da Bologna, vidi letere, di 21 zener.* Come de li li terramoti à fato grandissimo danno. El qual comenzò a di ultimo dezembrio, e fin quel zorno durò, e sempre fo sentito, o pocho, o assai; et le miglior caxe di Bologna fendete le muraglie et parte ruinate; e l'ultimo trete la note di San Sabastian, che fo grandissimo, a hore 6 di note, *tamen* a niuna persona à fato a mal. *Item*, de li è gran carestia di biave, val la corba lire 6, soldi 6 di bolognini, che pesa lire 160 a la sotil. *Item*, fo divulgato, don Alfonso, fiol dil ducha di Ferara, avanti la morte dil padre feva 200 ballestrieri a cavallo; et che l'impeador dimandava passo a Ferara, e vituarie, per cavali 12 milia, perchè avanti el mexe di febraro vol venir in Italia e andar a Roma. *Item*, li pisani conduseno per suo capetanio el signor Bortolo d'Alviano. A Roma era gran charestia, val, a raxon di la corba bolognese, lire 8 di bolognini. È da saper, missier Zuan Bentivoj, dubitando di questi terramoti, qualli ruinò meza Bologna, fè far processione, con homeni vestiti di sachò; fo ordinà dezuni, e pene a chi biastemava. *Item*, a Ruigo *etiam* si senti il terramoto et altrove.

*A dì 2 fevrer, domenega, fo il zorno di Nostra Dona.* Il principe fo a messa in chiesa, con li oratori, et ben acompagnato. Da poi disnar andoe, con li piati, a levar el reverendo domìno Antonio Suriano, prior di la Certosa, et meterlo nel patriarchado, el qual avea *tandem* auto le bolle dil papa, et lo leveo di Santo Antonio. Era con il principe li oratori, Franza et Polonia, et questi episcopi: di Spalato, da cha' Zane, di Coron, di Franceschi, di Famagosta, Brexan, di Feltre, Pizamano, di Cità nuova, Foscarini, el prothonario Mozenigo, l'abate di Borgognoni, Trivixan, domìno Andrea di Martini, el prothonotario Marcello, e altri; et procuratori: sier Nicolò Trivixan, sier Marco Antonio Morexini, el cavalier, sier Tomà Mozenigo, sier Domenego Trivixan, el cavalier; e sier Zuan Surian, suo padrè, di sora di altri, molto honorato. Et il patriarcha era vestito di frate certosino, con uno manto con la coà longa, di sopra, negro. Or li canonici aparati, lo riceveteno, et el vescovo di Alepo con la mitria; et la chiesa era ben conzada. Et il patriarcha, è intrato in chiesa, fo fato uno oration per uno Philo Musio pi-